

蘆洲詩鈔

上

柳田文庫
文庫11
A1200
1



文庫社
A/2000
1

文久壬戌陽月新鑄
文久三年

蘆洲詩鈔

蒼蒼齋

蘆洲詩鈔叙

方今後進之徒以才子稱者不為少矣而皆不及先達其故何也由其信師之不篤而攻業之不專也余觀今之才子輕俊自喜了無特操朝從某外史而問文焉暮就某居士而諮詩焉文已不成詩亦不熟於是弟子視

師如傳舍師視弟子亦如羈旅不敢
竭情實也然則雖有超群之才豈能
臻其妙哉先達之士其信師也篤其
攻業也專用畢生之力以求一枝之
精是後進之徒所以不及也門人植
村子順弱冠師事于余迄今十五年
矣爾時後進之徒偕子順入吾門者

皆棄業叛去而子順異於是積歲沈
研詩學遂究其精奧每得一篇必未
質余猶如前日也客冬子順料理舊
稿重請余正其舛密嚴奇峭奄有詠
家之美非信師之篤攻業之專者孰
能到此以則後進之徒所以及先達
之士也嗚呼子順今年三十三秋來

將有浪華之役。所至窮山水之勝。不以官事家累改其度。而後余之所望於子。頃者不獨斯集也。文久二年。未夏。星回節。枕山老人。大沼厚撰。



單山常書



柳田泉文庫

邨嘉平刻

蘆洲詩鈔卷之上

江都 植村正義子順

戊申 **嘉永元年**

關氏開歲宴。大沼先生偶至。余初仰望以為已師。乃請入其門。時正月念二日也。

關家開歲宴。一謁仰而歎。學合洪鈞律。詩如宛轉丸。君纔過有室。我尚未加冠。願借春熙暖。孤梅破凍寒。

同前席上謝主人

關家與植家。五世舊交親。雪江及蘆洲。文字證宿因。詩書雖異業。好共責日新。君懶而我狂。不免違世人。且謝



東道恩。遇此熙熙春。

梨花夜月。同外木醉月賦。

月轉西廊漏點加。未央左掖絕喧嘩。半庭寒影人無夢。
五夜晴光玉有華。雲濕紗窗春冷淡。風吹銀燭雪橫斜。
丹青畢竟難描寫。此是瑤臺第一花。

野菜花

黃蕊叢叢簇歲華。春晴一色透籬花。金畦新闢蜂王國。
繡壤遙連蝶使家。暖意滿郊殘雨斷。野香十里夕陽斜。
却思村落逢人日。和雪園丁摘嫩芽。

暮春書感同松靄師賦

欲乞東君借好春。其如夜雨洗芳塵。揚花剩有顛狂態。
漫逐迴風唾路人。

盆景

舟橋晴潭揭題

尺許盆中境自閒。愛茲幽景似仙寰。數家茅屋市廛外。
一局石枰花竹間。雨洗旱埃苔漠漠。風搖涼影水潺潺。
如今誰倩長房手。縮得吳趨消夏灣。

秋柳

離情欲縮折應難。野火燒枝樹影單。灞岸春風牽舊夢。
渭城朝雨帶秋寒。金衣公子艷歌阻。赤弁大人狂舞闌。
一夜陌頭霜似雪。畫眉誰復倚欄干。

秋思次放翁韻

入眸清景總無邊。萬物經霜更肅然。留送雨聲荒野路。
鴈涵秋影暮江天。從吾所好阮生酒。與汝弗如張氏錢。
富貴浮雲多變態。權門寥落一年年。

至日。同大沼夫子家里學人。陪大垣侯老小原君
宴。分得臘字。

江郎陽生客裏春。此老酬節開酒榼。應有官梅動詩興。
還如裴迪在東閣。折簡好招杜甫徒。梅花深處聯吟榻。
知君不解窮日愁。醉客亦能忘逼臘。

初雪

瑤花飄地薄仍輕。隣舍開筵足笑聲。遇雪情懷如遇客。
初來一度喜相迎。

己酉嘉禾二年

春陰

春淺幽庭淡霧霏。一番芳意暗中微。桃花似惡其文露。
披錦猶能加駉衣。

暮春十日夜。同橫山湖山老人。越智夢吉子。看東
台月下櫻。遂飲小西湖蓬萊亭。

櫻寺弄芳宵可憐。詠歌仍好著青蓮。花除桃李園仍梵。
酒置蓬萊客亦仙。月帶廊陰清入畫。湖和山色麗成篇。

蘆芽也自抽尖筆。裝點春洲淺水烟。

梅雨

門扁寂寞絕蹄輪。碁子敲殘待故人。麥候秋風纔幾日。
梅天煙雨又經旬。蜀王有恨雲難散。齊女無聲暑未勻。
一夜乍晴吟思好。松陰疎處月華新。

柳橋納涼

柳橋夜色與涼宜。銀燭樓樓川兩涯。烟火放花呈巧戲。
畫船弄水趁清嬉。眼前已占凌歌榭。身後何須墮淚碑。
滿坐佳人頻一笑。石心誰復說吳兒。

初秋夜坐

愛此秋容也不凡。翠嵐涼罩萬松杉。素紈已擲名姬扇。
白葛猶披隱士衫。烟散湖山開月鏡。雨收天漢掛雲帆。
窓前最喜豁心目。讀盡涑園書半函。

遠山雲如老人。卜居江都。新編刻成。余贈以一絕。
騷壇各自榮功勳。流麗何人可比君。君句君名成一副。
匹如藹藹是春雲。

西園公讌

清夜宜清宴。高月上高岡。敬客公子意。飲之以瓊觴。飛
蓋沾風露。輕輦送桂香。天鴈寧亂序。池魚也成行。公子
有幽致。此遊退嬾嬾。坐客饒奇韻。吟賞忘侯王。西園此

時樂便應比栢梁。子建千古賦。一誦一斷腸。

賦得初冬晴和

新晴皆快意。我亦出吾廬。風物春相似。煙霞畫不如。橘香堪貯袖。楓艷欲停車。誰信此時節。唯能宜讀書。

枇杷花

數枝寒綠敵霜辰。細雪成團不著塵。盧橘當年能辨偽。款冬今日始知真。園中載酒風流士。花裏閉門佳麗人。別有詩僧長愛惜。低徊樹下寄吟身。

照歲燈

爆竹伴來年。又年。火山何似舊時妍。市塵連竈齊能點。

旅館羈人獨不眠。歌席彩光留晝景。吟床金燼帶春烟。多情似解隋家恨。一夜啼紅到曉天。

庚戌嘉禾三年

春晚雜詠

行春有脚去駸駸。葉底紅稀綠作陰。獨立斜陽幽砌畔。閒愁更比落花深。

芳園人去草萋萋。微雨廉纖簾幕低。燕子戀春情不淺。落花蹊裏啄香泥。

勝春

勝春永晝屬幽棲。氣候清和與物齊。上苑葵花能向日。

陰山桃李自成蹊。琴中但覺南薰動。窓底寧知夕照低。
別有農家多笑語。黃雲掩映麥千畦。

初夏林亭

春盡林亭艷夢闌。水晶叢白曙光寒。幽人睡起濛濛眼。
誤做梨花殘月看。

夏山欲雨圖

雲趁奔雷風有威。峰巔漠漠雨將飛。竹敲屋角翠交侵。
電照塔尖紅發揮。潭底大魚時欲躍。林間小鳥自相依。
宛然又看劉裒畫。但覺清涼灑我衣。

秋日將戍浪華城留別卯木醉月。

有約吟朋終欠伴。無聊游子獨離鄉。相思豈得分身術。
遠別難求縮地方。楓葉荻花幽渡畔。暮煙秋雨野橋傍。
何堪千里阻携手。行色催人仍斷腸。

晚秋家嚴書中有禦火災禁晝寢警言語之三箴。
其嚴訓深恩。非帝不堪感泣。而刻骨砭身。實悔兇
之昨非也。謹賦七律三章。揭之齋壁。以示奴僕。適
有例便。書以呈膝可。

恩書幾尺感何窮。刻骨從今警我躬。小冷爭湏開煖炕。
高寒應是倩屏風。二更消滅玉蟲燼。初夜藏埋紅獸空。
自賦詩篇日三復。壁頭揭得示奴僮。禦火災

眼似鰥魚心自澄。他時疎放悔吾曾。豈能習懶為攤飯。
寧復偷閒就曲肱。許國有心腰下劍。思家多夢枕邊燈。
君恩父澤真須報。朽木其如百不能。禁晝寢
纔解唇寒語便空。履霜何耐暮秋風。小人得喪全非外。
君子樞機是此中。鴈為高聲逢弩矢。蛩因多韻入紗籠。
老聃遺訓豁然悟。智者不言能立功。警言語

辛亥嘉禾四年

春睡

春睡真成勝按摩。不知微雨過庭柯。日高丈五南窓暖。
人在堯夫安樂窩。

遙想

遙想江都芳事闌。山城三月尚輕寒。一函春枕容殘夢。
幾尺家書費細看。身喚主人元是客。廬如村舍強名官。
黃昏睡起多新恨。目送飛鴻渡遠巒。

初夏雜興

三月梢時過。方逢四月頭。忽看千頃麥。已作滿村秋。
生熟衣無準。陰晴天有謀。山城春事盡。羈客獨凭樓。
簾外南薰動。官廬坐晚晴。一年流轉景。千里別離情。紅
藥交黃菜。新鶻替老鶯。瓜期今尚遠。何日向江城。

夏夜即事

幽庭雨過寤書堂。猶有餘聲滴夜涼。暗綠陰中紅一點。
濕螢無力坐垂楊。

出游二首

阿部郊頭晴景遙。啁啾雲雀上青霄。好將農事告天子。
從此夏畦辛苦饒。

祠前行盡水波浪。岸畔姬松已老蒼。猶有梳風舊時樣。
碧釵千股落斜陽。

梅雨

陰雨窓昏晝似晡。懶眠一覺客情孤。病餘直欲焚吟稿。
醉後何堪打唾壺。花艷籬邊紅躑躅。露清盆裏碧菖蒲。

也知節物催端午。手把離騷靜據梧。

鴈字八詠

十里晴江秋影連。萬形任意是天然。新奇玉篆朝暎外。
古樸丹書夕照前。蘆白展來瑤雪紙。楓紅染出錦雲箋。
歛昏細字和殘墨。忽作模糊一幅煙。

日中

冰輪光冷夜三更。鳥迹書空越樣晴。仙掌過時飛草漸。
瑤宮渡處擘窠成。瀟湘清怨題琴意。樓閣孤愁寫笛情。
字字姮娥應讀盡。鏡中印得自分明。

月中

冷壓雙翎字態奇。板橋人絕水西涯。蒼葦影接寒汀暮。
白露光凝早曉時。凍墨灑來能古瘦。健毫揮得自斜欹。

俗書趨媚應輸汝。狂筆通天足藻思。霜中

湖上驚瀾捲翠箋。翔禽題字影翩翩。垂金楓葉輕翻岸。
飛白蘆花漫撲天。亂草猶分兄弟序。斷文能綴短長篇。
毫端剩有鳴聲急。掃破黃昏淺水煙。風前

秋空點點帶愁勻。少婦相看鎖翠顰。字態又同粧態亂。
墨痕仍與淚痕新。錦機不分裁來斷。鸞鏡生憎印得真。
却解妾身離別恨。寫將相思寄良人。幽閨

噉唳聲聲與影宜。一行斜字印空奇。壁中曾認活東跡。
池上今看鳥篆姿。半硯冷雲研墨處。滿屏驟雨試毫時。
萬工揮筆真堪學。欽汝天然是我師。書齋

征鳥偏能作恨媒。旅懷寫向眼邊開。苦辛其奈行行亂。
零落何堪字字哀。湘浦夕陽烟慘矣。淮南秋雨夜悠哉。
與卿共是經年客。草破平安鄉信來。客中

陣陣排來兵氣深。雲箋幾字暮蕭森。長篇點綴昭君怨。
短札分明蘇武心。一曲胡笳青塚畔。數聲寒角石樓陰。
應傳新著邊防策。爭趁高秋向上林。塞外

城居

廬在城隅短堞間。難將高眼仰青山。閒行枉學魚千里。
偏見終歸豹一斑。蝴蝶無心狂似夢。蝸牛多事觸爭蠻。
羈懷空負江湖興。未買漁蓑向荻灣。

筆捨山下小憇

竒松怪石勢崢嶸。倚遍亭欄吟未成。筴比當年元信叟。
彩毫一擲拾芳名。

金線草

瑣紅裝點杪高頭。尺許枝間芳意稠。蟹殼離披圓葉小。
柳條裊娜細莖柔。可憐歲晚霜餘草。能占重陽菊外秋。
最惜幾絲金樣麗。不追織玉綴輕裘。

九月十三夜作

白露為霜夜氣清。幽人不睡坐深更。詩拋俗累方知妙。
月帶秋寒倍覺明。文雅大臣憐太宰。風流天子憶

寬平。四隣此際唯高枕。誰會吾曹百感生。

開爐同毅堂學人賦

于貉此時其奈貧。火沐温處且容身。敢要世上一陽至。
方寸間開天地春。

苦蠅每句押韻

日轉南榮欲亭午。營營趁暖蒼蠅聚。雙脚按掌依窓戶。
凍身便得生迅羽。須臾相號為行伍。几邊盤中溲掠鹵。
欺吾讀書坐受侮。來登頂上頻摩撫。投筆忽發王生怒。
不遑拔劍且揮塵。乍去乍來難擊拊。作惡半日令人苦。
日暮寒風振虛廡。忽然落處空樞俚。君不見小人得意

命有數。一時天寵不可估。

宮中曉寒歌

寒聲報曉輾轡轉。畫屏花凍燈現現。猶是夢影和香篆。繡簾不許曉風捲。覺來嬌愁難消遣。鴛衾戀暖情縷縷。暝影上窓寒漸淺。睡起初看柳眉展。裁縫慵復把金剪。柔荑裏袖候溫軟。恰有侍女勸香葑。紅爐昇沸聲觸鉉。

河豚歌

蒼海月黑夜風吹。正是河豚落網時。毒魚原與九魚異。無類無鱗形最奇。觸之怒氣忽滿腹。腹中有乳號西施。自非橄攬蘆根汁。人中此毒更難醫。牧猪之奴游俠客。

此物上市爭買之。一年能看幾人死。拚命食毒不復疑。貴家防此尤忌毒。美色之毒渠不知。

梅市

一路芳塵拂面飛。萬燈照歲耿春暉。恍然身入羅浮市。滿眼佳人盡縞衣。

臘八粥

各家煮粥趁茲辰。臘八村場節物新。施舍浮名元出佛。調和妙訣遂歸民。五香蒸就慈悲雨。雜菜糝來溫飽春。此物充飢寧繼富。只能周急一簞貧。

山村冬暮次林和靖韻。同日下部夢香。服部樂山。

賦

蕭條門戶冷。雪意結蒼茫。啄木鳥翻影。欺冬花弄香。只看山水靜。不識暮年忙。一夜寒燈下。夢巡春草塘。

壬子嘉承五年

二月初午日戲為

簌簌雷鼓湧春村。社酒吹香滿瓦盆。跋扈狐王太無狀。萬頭白帟忽平吞。

仲春訪栗原醉月即席二首

尋君今日便逢春。但覺一團和氣新。花徑何須緣客掃。香風滿院淨無塵。

午簾風暖捲新晴。花氣薰人殊有情。對坐日長深院靜。碾茶聲裏聽嬌鶯。

花朝前一夕作

愛此微陰日。吟情亦淡如。閒行依水木。幽坐伴琴書。簾外綿蠻鳥。盆中潑刺魚。先欣春物活。明日百花初。

花上金鈴

一聲羯鼓已催春。吩咐卿卿保護頻。莫駭海棠嬌欲睡。須防野鹿點能馴。綺筵晝暖搖紅索。銀燭宵深弄玉唇。似語繁華唐殿事。憑風響遞艷陽辰。

柳絮詞

蘇州詩金卷之十一
春風吹處即為家。愛此顛狂態度嘉。應是前身漂蕩子。
飛來故入馬頭斜。

裁得春綿纏細腰。輕輕飛舞寂多嬌。何堪楊子江頭晚。
相逐東風過灞橋。

春晚即事。次田邊秋屏韻。

閣閣蛙聲攪午眠。荷錢浮水碧田田。小欄乍喜春光活。
紅吐一枝新杜鵑。

花蛤蜊

海口潮乾上巳辰。時看花介糝芳蘋。前身雀化仲秋水。
舊伴燕飛三月春。敢要和羹相料理。偏憐一味自鮮珍。

女兒撈得供何處。先薦壇頭綵勝人。

春晚書感

階苔日厚客來稀。烟雨蕭條畫掩扉。垂柳陰寒鶯獨語。
落花泥滑燕雙飛。青樓薄倖羸狂夢。紫陌紅塵記醉歸。
莫道今年春帶閨。忽忽依例送芳菲。

煮茶聲

蟹眼尤宜活火煎。清聲滿鼻氣翛然。松濤破夢翻爐上。
花雨留春濺枕邊。涼似建溪波捲月。幽疑碧澗石噴泉。
不須七椀連嘗後。一聽耳聰人欲仙。

江亭晚望

白雨驟過江上亭。斬新秋氣入疎櫺。數聲橫玉客邀月。
一柄羅紈人撲螢。楊柳受風偏嬾嬾。芰荷含露寂娉娉。
微涼更引扁舟興。水色山光萬里青。

秋社祈晴

八月十日熙熙堂詩會席上得風字
此日霖雨遂為大風雨又有轟雷

壬子秋八月。淫霖晝濛濛。連延迨十日。潦水亦已洪。剩
有馮夷怒。振鞭驅豐隆。欲傾海渺漠。將拔山巖崕。摧墻
掀茅屋。其暴苦萬農。麥化飛蛾盡。粟為毒蠱空。誰復遑
寧處。不啻心恫恫。祈晴村前社。人影集幾叟。鳴鉦仍擊
鼓。錚錚雜鼗鼗。加之以號泣。只願碧翁聰。果然天有耳。
此聲乃能通。豐隆馮夷去。忽焉見蜿蜒。人轉憂為喜。相

賀仰蒼穹。所應無貧富。始知天道公。却怪太平世。有災
人盡蒙。不知誰能致。暴雨與烈風。

聞鴈懷河田煙陰

俗人只謾重官榮。不知富貴如雲輕。偉哉吾黨養吾子。
棲遲林下樂平生。與我曾游浪華地。能令吾心忘名利。
只說江湖汗漫游。不說市朝紛華事。兄昨歸省滯與州。
江都我抱索居愁。書信久斷平安字。豈堪風物逼悲秋。
霜鴈一聲小窓暮。遙凝北望復西顧。鴈鴈何不帶書來。
來時應過松島路。

小重陽限韻

蘇州詩金卷之四
十四
猶看蝶來旬。銜杯也及辰。詩家重設宴。秋色更娛人。送
酒衣猶白。題餠字亦新。興情寧減昨。能會好朋親。
一籬黃侯旬也。勝百花辰。試問沾衣客。不如開口人。重
陽還喚小。佳節再逢新。秋士與秋物。情懷私自親。

雪水仙

一掬天花當換丹。洛神清致好重看。玉釵影重戴金鳳。
羅襪步輕。驟白鸞。塵絕銀臺冰袖淨。香薰晶殿翠裙單。
梅兄已占江南暖。春信相通慰暮寒。

橙杯

擘開儘好屬吳娘。奇製今看換酒觴。膏潤色凝湘浦雨。

清華氣泛洞庭霜。魏家荷葉夏消暑。彭澤菊花秋吸芳。
冬飲別誇金殼貴。江南佳味入杯長。

茶梅

衆芳凋謝歲將闌。獨有奇葩飾小欄。雅素喚成新雪降。
粉紅留得夕陽殘。茶因分姓自饒韻。梅為借名能犯寒。
寂愛此花開耐久。北窻子月當春看。

癸丑嘉禾六年

暮春余將赴京城。小憇名驛忽聽隣樓彈三絃。
其聲清婉頗類江都時樣。感而賦。

海畔放顏天氣新。小絃清婉隔墻人。忽忘七里風波苦。

恍坐家江二月春。

廬玉川煎茶圖

夏日之好勝春日。官廬之間比吾廬。遙想熙熙堂詩會。課他玉川煎茶圖。我欲題之難遽就。推之敲之毫未濡。苦吟時復成倦夢。曲肱不覺廢據梧。無端叩門來何者。故人恰來自江都。匆匆開門迎倒屣。相見一笑我忘吾。試問不遠千里來何惠。便答薄言求之寄靜娛。戀戀猶有故人贈。其茶是新其甌烏。拜而受之手自煮。意急于火豈待奴。一椀眼先爽。二椀氣如蘇。三椀倦能遣。四椀趣漸殊。五椀忘羈恨。六椀脫塵拘。七椀喫未盡。夢驚人。

已孤。茫然顧影長大息。未辨夢乎或真乎。前身果否玉川輩。故人仍訝諫議徒。漆園曾聞周化蝶。官舍今知我成靈。熟視人世渾如此。富貴貧賤夢一區。人生隨處且須樂。寧分家園與官途。况復綠陰好天氣。京華節物樂事俱。乍驚松風翻坐上。宇茶恰熟活火鑪。

五月十七日。中祖父菽屋君忌辰。恭作長歌以代

祭文。

我之祖父菽屋君。能詠能飲足聲聞。文化丁丑夏五月。化仙忽地躡白雲。今茲嘉永癸丑歲。隨父京城此番衛。黃梅雨薰白橘花。感此節物正堪祭。嗟呼先君之為人。

豪爽風流甘賤貧。振毫能追人九聖。引爵擬奪大伴真。
一年勝景詠何泄。春花秋月冬之雪。三百六旬無不醉。
只愁胸渴不愁裂。今也祭之豈依夷狄佞佛書。只擬君
子風高。皇國初。金樽凸矣千斛酒。銀盤堆兮萬尾
魚。遺像一幅壁頭掛。先以供之起再拜。更招僚友歌以
飲。祭如在矣各稱快。晉之醉侯唐謫仙。輸我先君能樂
天。今日乃孫何人也。襟豪不及况才賢。生來只知太平
樂。謾吟閒醉無智畧。先君先君令我豪或賢。不入湖海
必臺閣。

午睡起

夜坐連清曉。讀過書一床。啜他暄午熱。引睡到斜陽。雖
著冰紈服。終成糞土塲。應輸鬪碁客。能愛晝陰長。

放龜

家僮捕龜城中溝。携來官舍乃繫囚。我且不忍便將放。
告之仍以護身謀。龜乎龜乎汝之壽也必萬萬。唯須水
底沈默莫輕浮。且曰汝之行也太遲遲。莫為泥中曳尾
石上休。聽我斯言如有愧。俯藏手足且感頭。言終臨水
即放此。顧我如揖去則游。我知人龜性不類。惡死愛生
情何異。寧求躡物到岸報。敢迎鑄印回首瑞。嗟呼黠僮
作惡何殘忍。靈龜遭厄何容易。歸來就座重歎息。此心

亦銘六藏字。

余久耳星巖翁之名。未得面晤也。今歲官于京師。曰往見焉。其樓容豁岳窓枕鳧川。真是嘉遯之地。羈旅余輩。豈不欽慕乎。乃賦唐律一章以呈。時嘉永癸丑夏六月三日也。

少陵棲止好相求。長夏江村幽更幽。誰料去天纔咫尺。獨能忘世便優遊。簾含山色翠欲滴。簞引水光涼欲流。愛此仙壺無熱界。借他一洗甌中愁。

聽蟲

夜深人定夢成空。卧聽新蛩叫暗叢。一種愛他饒好韻。

滿城渾是應聲蟲。

戲題便面

東郎清致翠篁篠。洛女艷容紅藕花。玉管一聲鳧水綠。納涼樓是酒仙家。

新秋出游二首

詩人此地少。詩景此地滋。詩景人不管。詩人誰復知。偉哉梁川叟。收景能入詩。水月揚輝夜。山花炫色時。我亦樂山水。今官于京師。此人與此景。出城先問之。紉川梁川叟。併得慰所思。景物終無盡。人生必有涯。

如翁吟骨冷。永觀堂背堙。元是江戶子。曾趨京華春。生

前重口腹。千錢不說貧。和羹塩梅事。一一手能親。此地
乏豪舉。誰復賣鮮新。爾有不惬意。爾酒寧到脣。與君雖
異世。我亦同鄉人。落日西風下。一吊尋前因。

過高臺寺

山氣初涼紫翠開。高臺寺裏看秋來。愛他嚴禁還非俗。
莫向幽蹊刷舊苔。

今茲嘉永癸丑。家嚴奉命充京城半年役。春三月
携余來京師。秋九月留余歸江都。嗚呼離別之情。
於他人未能相割。況於父子之際。得無斷腸乎。然
而父之劬勞於子。其常也。子之於父。亦可以能安。

其心矣。席間呈離歌一闋。奉慰家嚴之離懷。且告
兒之深衷。蓋欲家嚴之歸江都。而不顧念京城耳。
東都東風携兒來。西京西風送爺回。勸爺莫牽脫葉恨。
勸爺莫留斷鴻哀。官廬僚友皆兄弟。自誓不破同心契。
青樓名妓能傾城。自誓不羸薄倖名。菊花探借重陽酒。
一杯獻壽且須傾。

同送弟阿益從家嚴歸江都

弟也追隨父也歸。朝昏定省莫乖違。鵠原縱免急難事。
忍看荆花相背飛。

弟也祗應學大娘。劍之短勝戟之長。好從嚴父防東海。

莫望吾儂陟彼岡。

題祗王祗女嵯峨野秋居圖

洛陽苑中多春韶。洛陽苑裏是狂飈。九十繁華能幾許。名園秋後空寂寥。姊妹芳年春未半。嵯峨野邊趁秋旦。不願桃李榮苑中。只願松柏老澗畔。美色誤身感何窮。不唯班女泣漢宮。君不見青塚路邊砂磧底。又不見馬嵬坡下泥土中。

城西尋秋二首

古矣高僧登化山。尚能留寫在池間。雙鳧今日無人見。折筆風寒綠一灣。

前山影暗夕陽收。歸路蒼茫看更幽。點白且疑棲樹鷺。八十八箇佛燈樓。

鈔書

鈔書日欠課。只恐心期違。偶曰有客廢。且為病所支。忽忙與愁苦。每不達吾思。但願閒仍健。日日并得之。或欲出家去。捨父又何為。又將入山了。辭君竟歸誰。倚机默然坐。忍看寒日移。不尤仍不怨。自慰復自悲。時聞笑語鬧。沿壁耳暫欹。乃知隣官舍。冬釀香正滋。招客補醉興。呼奴謀肴資。左手持霜蟹。右手舉玉卮。獨我寒燈下。繼日下書帷。區區大癡計。僚友皆應嗤。

髯奴篇

嗚呼髯奴非俗人。嗚呼髯奴亦閒民。貴猶不願何況富。
也能甘賤能甘貧。一生不抱不平意。四方隨寓自由身。
呼彼為兄我非弟。自稱曰子他非親。豈無家族在鄉國。
飄然身自絕累因。求主只要宿與食。懶惰不堪使令煩。
有酒陶然朝朝醉。閒度清夏與艷春。無衣傲然日日卧。
不知雪夜仍霜晨。柴門有敲不應客。林園可掃猶委塵。
髯奴之樂君須羨。髯奴之頑君莫嗔。

常盤立雪圖

同雲漠漠萬里平。寒壓步蓮凍不生。生憎雙袂鴛鴦繡。

玉閨春夢空關情。阿乙猶小爭先步。低鞋粘地如凍鷺。
阿今纔長難自持。暗淚無聲手空煦。牛兒在懷渾不知。
呱呱求乳頻訴飢。妾身縱死亦不怨。將軍遺愛將何為。
惟看積雪深幾尺。寧料他年葬怨魄。君不見一之谷檀
之浦。風翻旗影滿天白。

歲晚京城一雨頗暖

夜來多雨澤。客子仰晴天。水色送殘臘。山容迎改年。含
春花欲笑。知暖鴨將眠。早遇陽和使。長安近日邊。
五更寒勢減。滿地凍風墮。衾鐵纔能脫。心冰旋復開。暗
舒東面柳。微放北窓梅。莫欠詩壇菜。春催又雨催。

三宅子質頗熟火術。余贈以此詩。

子質時隨父某在京

源流窮種鳴。餘派達西洋。欽君見機早。東海實足防。愚者推我古。携汝弓劍槍。大功在巨銃。一發震戰場。吁我迂拙甚。區區說文章。十有餘年業。無一奉君王。

東坡坐玉堂。圖得壺字。

絕代奇才恩寵殊。玉堂春色滿芳壺。可憐金燭光輝短。不照黃州客夢孤。

歲暮書感

客邊日月太崢嶸。筭盡五十三驛程。已逼歸年雖可喜。依然惜舊亦人情。

甲寅安政元年

今茲甲寅六月。正當

天家儼日。傳聞此日開

東門。使士庶縱觀宮殿。予官于京。乃往拜焉。不堪

感恭賦七古一篇。

天家今日春已多。率歲之例成大儺。下

詔時開東

門鎖。大庭儘容士庶過。我是江門抱關士。久聞

上宮殿美。幸自今年官京城。今日何日來於此。只覺滿

地光風生。吹我飄然雲上行。祥色尚綠右邊橘。瑞氣暗

薰左畔櫻。吁嗟古之

帝居多壯麗。金碧樓閣連雲

際。今日

帝居退奢靡。屋階之素神代製。由是視之

我豈貧。穴居野處亦協身。羈旅何望過分福。有廬坐迎
太平春。

竹窻聽新鶯。分得春日鶯啼脩竹裏。

日高山窓睡正美。何物呼我睡忽起。乃是金衣小公子。
求友數聲隔窗紙。也知此曲差堪擬。不知此聲何所似。
吳歌纔動未見齒。秦箏初弄漸搖指。一夜驟暖雨霏霏。
滿庭竹色綠如水。欽卿能知其所止。清歌幽處伴騷士。
為怕此地去天咫。出門便是繁華市。莫放高歌驚人耳。
網卿將入金籠裏。

粟原醉月。緘梅花于書中見寄。乃報以一絕。

想見春光第一來。聚芳館是小蓬萊。滿窓和日惠風暖。
笑抱鳳雛看玉梅。

春晝獨酌

花時何可鎖官門。十斛春愁付一樽。蠢爾雖身違景物。
浩然之氣塞乾坤。烏衣紅榭豈無巷。流水桃花空有源。
日影最遲鈴閣暖。醉眠長記太平恩。

暮春得河田檉陰書喜甚。賦此寄之。

昔年庚戌在浪速。晝同吟榻夜書檠。明年辛亥話遠別。
君歸陸奧我江城。檉陰春月蘆洲雨。燕去鴈來空復情。
枕山夫子與醉月。疑君仙去騎長鯨。今年甲寅戌京洛。

寤寐求之意不孚。豈料經年宿痼愈。黃蠟一封報平生。
正是艷陽好時節。百物逢春一般榮。春風始吹芳蘭氣。
客夢忽破好鳥聲。見說間中有事業。深諳韜畧細論兵。
化龍之筇尚藏否。今也試作房山行。檀陰曾有詠杖詩

暮春嵐峽看花

春是詩家物。春來詩思加。閒游應獨往。俗侶厭喧嘩。只
要行有屐。寧妨出無車。凝碧鷗邊水。抹紅鴉外霞。會心
不在遠。近有林水嘉。距城纔數里。便是嵐峽花。
春隄柳是腰。春山花為骨。投竿碧潭淨。敲火白石滑。愛
此花間泉。流出香霧窟。况復夜夜游。渡槁人如月。迎我

景何多。應接易倉卒。想見山陰道。山川自映發。

雨餘游東山

滿山花委雨餘塵。夏木陰陰綠一新。樓上酒人渾不省。
泥他紅妓唱梅春。

暮春游金閣寺

金閣巋然臨碧池。將軍當年真極樂。意匠不讓帝王
居。其壯其麗壓京洛。屋材萬種已良美。園石千株更磊
落。遺像留在閣當頭。綺羅曾此恣游譁。嗟呼榮華亦有
涯。春殘催我感懷詩。夕陽銜山鴉陣黑。芳樹紛紛花落
時。

瓶枕落盡

落盡瓶枕紅幾遭。此間不用掃除勞。疎慵却似豪華子。
端坐花裯獨作高。

東海歸路輿中作

直過山路又江天。坐轎人如騎鶴仙。官道歸鄉百餘里。
不曾踏地去飄然。

鈴鹿山中杜鵑花蝴蝶花殊多因賦

夏木花開春草稀。與吾交替不相違。雨凝紅恨杜鵑吐。
風引粉愁蝴蝶飛。

小夜中山夜鳴石

小夜中山石。一夜發大聲。土人傳其故。相呼做夜鳴。今
我了遠役來。此踏官程。當路卧何物。傲然怪石橫。曾聞
天家使。相避不相爭。又見官道吏。欲移遂不成。怪哉頑
到底。獨占千歲名。憐他芳蘭質。不得當門生。

輿窓小筒遍貯路傍花卉有作

花裝官道簇芳菲。插向輿窗春不違。紅紫纏身如衣錦。
路人誤認買臣歸。

今茲甲寅初夏。余自京城歸。賜五旬之間。而未出
游也。端午後二夜。同栗原醉月携小弟。宿墨隄東
屋主人別舍。聞秧鷄。而得詩數篇。漫錄以記一時。

之快游。

曾趁繁華游洛陽。又隨新綠向江鄉。黛如山印鏡如水。
絕勝洛京脂粉粧。

風流東屋主。堤東占別樓。家多佳眷屬。門絕俗輪蹄。有
女能敬客。舉案與眉齊。而翁具道骨。話說雜滑稽。六十
六山水。無處不著鞋。嗚呼無官樂。南北又東西。吾心亦
豈俗。吾身與游睽。對此終忘睡。得詩即一題。合坐青燈
下。未有聽秋鷄。

蛙市漸散夢將闌。恍聞剝啄落枕間。出戶蒼涼月滿野。
吟身頓覺脫塵寰。何物有意共擊磬。與僧家音非一般。
尋聲行遍未知處。吾意已倦步亦艱。秧田之際忽遇鷄
骨叟。見我一笑乃解顏。且曰吾將老農圃。知音何要鴛
鷺班。謝君今夜來訪我。我嚮迎君叩柴關。言罷與月影
同沒。空郊漠漠無路還。回顧身卧青柳下。別舍扁青柳烟散
東郊日滿舍。只訝夢中彼叟言。莫乃秧雞證前夜。

絕句六首。贈劍客某生。

撫劍平生氣帶霜。欽君鐵石舊心腸。可憐一夜消磨盡。
去作巫山雲雨行。

春曉寧堪出綺扉。柳絲帶雨挽郎衣。其如慈母黃昏底。
每倚門闥望汝歸。

落花風雨五更天。戀暖鴛衾春可憐。邂逅只言適吾願。好因緣。是惡因緣。

稗史看來是世模。風流才子竟成愚。揚州喚做蕭郎日。十萬腰纏果有無。

溫柔鄉裏花千朶。辛苦海中波幾堆。名妓有言君試聽。客差解事不曾來。

送耳之言難自納。拍肩有手却相携。名園秋後請看取。桃李何曾松柏齊。

夢後書感

一宿空乘戀有由。數聲折柳便堪愁。戍樓曾結家園夢。

却到家園夢戍樓。

六月菊次袁枚韻

金鈴不復護金黃。玉色花開悵素望。避熱士穿幽徑遠。訝秋蝶遶曉庭長。何顏拭汗衣無粉。潘鬢成華鏡有霜。好為蔚宗新補傳。陶家一種辟炎香。

夏日曉起次清人韻

人間塵未起。雲漢與天長。鐵馬已搖轡。竹奴猶守房。池蓮紅弄艷。樹葛碧吹涼。朗誦香山句。無何是本鄉。早起趁清曉。寧會睡味長。短宵歸幻夢。靜境抵僧房。得此不言妙。納他無漏涼。記曾消暑舫。月落柳絲鄉。

階梧聲自冷。籬槿命猶長。卯酒今論戶。螢燈昨照房。眼
明疑起晏。心靜覺身涼。欠課今堪了。分離熱惱鄉。

茉莉詞

曾是叢林拜佛身。如今移得上城闈。素心應畏素衣化。
蘭麝避他京洛塵。

日承恩露翠寒堂。每鼓風輪賜納涼。侍立何人僥倖甚。
御前坐占雪衣香。

華鬢不理玉簪垂。日午南窓中暑時。月上瑤階初出帳。
勝他睡起海棠姿。

炎皇寵渥奈難酬。舊物唯應表別愁。吟咐薰風寄將去。

鬢邊幾朵玉搔頭。

風簾月帳夢吹香。可耐秋寒逼素裳。猶有情人時慰問。
一杯燭味進猪湯。

碧花一首。呈枕夫子。

此花開時日未生。何人早起摘其英。退藏殊早豈薄命。
幽芳自避日邊榮。碧絲能織素秋景。引接不上貴人棚。
仰之秋空同碧色。儵然難攀空嘆息。吁嗟乎夫子之墻
實數仞。不入其門。何知此花風流劇。

玉簪花

命薄風前易灑塵。玉環應是後來身。花鈿委地泥塗裏。

惆悵竟無收拾人。

秋初同枕夫子寬庭師。游水東看秋花。以放翁秋
花如義士為韻。

欲作水東游。步向東橋頭。誘我者誰歟。陶翁遠公傳。望
田檢稼立。入寺讀碑留。穿盡長隄曲。遙訪野莊幽。微陰
殊可愛。頓覺殘炎收。一寄扁溪興。三笑賞清秋。

秋花屬吟士。幽莊訝仙家。林下人不見。芳叢影交加。何
唯七八種。澹泊皆可嘉。濃紫擁門簾。細黃護籬笆。一段
快心處。數頃池水涯。白蓮真抵玉。西風不碎花。

村店乏飲儲。所喜俗客疎。烹芋配湯蜺。聊充飢腹虛。莫

嫌村酒濁。半酣意亦舒。庭陰無西日。晡坐意自如。

蝶引逍遙游。鷗分忘機地。詰朝過櫻隄。新稻垂嘉穗。薄
暮渡松崎。潮頭見沙鼻。近郊大有年。遠海應無事。憶昔
堯舜君。置他稷契吏。官無徵租私。民有讓畔義。

吾道平如砥。世情薄似紙。樗木乃散材。何遇龜玉毀。放
歌步晴郊。無事看秋水。相伴素與緇。出門閒如此。行樂
須在今。窮陰奈短晷。走馬彼何人。新進銜名士。

秋花次張問陶韻

愛他閒草著閒花。秋意蕭條一兩家。縱是無名還有韻。
只能處淡不居華。月霞腰沒山村路。雨蟋喉沾野水涯。

但有老尼供繡佛。鬢邊何復掠嬌鴉。

悲哉時節却陶陶。遠舍幽花韻自高。老圃秋容憐澹泊。
名園春事笑粗豪。今騎瘦馬客零落。曾輟香輪入繹騷。
野草不牽行路恨。西風斜日屬閒曹。

皇墟秋景正窮荒。春苑誰知簇麗光。古渡今年空野草。
御舟當日是沙棠。美人嬌淚化紅露。俠者英魂留暗芳。
幾種幽花無限恨。寒蛩泣盡斷柔腸。

斜日滿園光逗紅。照看秋草綻西風。繁華夢敗幽情現。
冷淡詩成俗韻空。春後池塘無謝弟。霜前籬落有陶翁。
商皇手段天然妙。枯筆生花老更工。

山中雪意

山山凍合陰溟溟。夕日收影北風寒。小鳥相依皆屏息。
猛虎一吼震林巒。樵婦待夫吹火急。沽酒童歸衣帶濕。
梅花隔溪一枝明。吟人獨倚石欄立。

十二月十九日。同枕夫子樂山。會叡北某亭。為坡
公生日。次清張船山韻二首

雨裝竒絕老髯蘇。莫怪當年畫做圖。涪叟亦稱磨墨婢。
荆公乃命負囊奴。秋清赤壁才華秀。月黑黃州客夢孤。
笑罵到頭君可記。神仙言行與人殊。

仰止風流翰苑仙。林園此會憶當年。才同太白用無地。

迹異淵明歸有田。戴笠騎驢尋往事。野花啼鳥証前緣。
松風一覺閒亭夢。依舊梅梢月皎然。

蘆洲詩鈔卷之上

邨嘉平刻

010190525886

48-13452

